

DATE: 6/12/2009

NGO Islam perlu jadi pemangkin laksanakan tanggungjawab

# OIC gagal menyatukan ummah

UM - 16/12/2009

Oleh ROHANI IBRAHIM  
pengarang@utusan.com.my

**KUALA LUMPUR** 15 Dis. – Pertubuhan bukan kerajaan (NGO) dari negara Islam disaran menyatupadukan umat Islam di seluruh dunia memandangkan Pertubuhan Persidangan Islam (OIC) gagal melaksanakan tanggungjawab itu.

Bekas Perdana Menteri, Tun Dr. Mahathir Mohamad berkata, rangkaian NGO dari negara Islam di seluruh dunia boleh menjadi pemangkin kepada perpaduan ummah masa depan.

“Jika kerajaan Islam (dalam OIC) tidak dapat mewujudkan satu perpaduan ummah dan usaha individu adalah terlalu kecil untuk memberi sebarang kesan, kenapa tidak umat Islam memilih NGO untuk mencapai matlamat bersatu padu.

“NGO Islam yang bersatu padu ini perlu berkempen dari semasa ke semasa mengenai kepentingan memiliki pendidikan sempurna sebagai kewajipan umat Islam,” katanya.

Dr. Mahathir menyampaikan ucapan pada Konvensyen Kedua Uniti Muslim anjuran NGO Islam dari United Kingdom (UK), Yayasan Ramadhan di Pusat Dagangan Dunia Putra (PWTC) di sini hari ini.

Jelas beliau, NGO Islam juga perlu melaksanakan kempen menghentikan pemikiran segelintir umat Islam yang sentiasa ingin membalas dendam kepada musuh Islam sehingga mengambil pelbagai tindakan secara membuta tuli.

“... Di negara-negara yang dicero-

boh, rakyatnya dipenjarakan dan disiksa sementara beratus-ribu lagi dibunuh dalam peperangan yang tidak adil.

“Umat Islam yang marah meluahkan rasa marah kepada semua orang termasuk masyarakat Islam lain. Mereka letupkan diri sendiri untuk membalas dendam dan membunuh namun tidak banyak musuh Islam yang menjadi mangsa melainkan masyarakat mereka sendiri,” katanya.

Kata Dr. Mahathir, selepas kehilangan nyawa, tidak ada apa yang mereka peroleh dari semua perbuatan tersebut.

“Dan semua perbuatan tersebut sedikit pun tidak menghalang musuh umat Islam ini daripada terus menindas dan membunuh,” katanya.

Justeru, tambah Dr. Mahathir, umat Islam perlu berfikir, merancang dan merangka strategi supaya pengorbanan yang mereka lakukan jika perlu adalah berbaloi.

“NGO perlu menggalakkan perpaduan masyarakat Islam demi mempertahankan ummah.

“Namun jika kita gagal menjadikan seluruh umat Islam bersatu kita perlu bersedia untuk menerima perpaduan sebahagian daripada umat Islam sahaja,” katanya.

Konvensyen yang dirasmikan Dr. Mahathir itu hari ini akan berakhir esok.

Ia menghimpunkan lebih 500 ulama dari 20 negara yang akan berkongsi pandangan mengenai perpaduan umat Islam.

Sebelum ini Konvensyen Uniti Muslim pertama berlangsung di Manchester, UK) pada 2005.



TUN Dr. Mahathir Mohamad mendengar sesuatu daripada Pengerusi Yayasan Ramadhan, Muhammad Umar sebelum beliau membuat ucapan pada Perasmian Konvensyen Antarabangsa Uniti Islam di PWTC, semalam.